



Sumáriu Kazu
Tribunál Distritál Oekusi
Abril 2020

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 3

Tipu kazu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	3
Totál		3

2. Totál desizaun ne'ebé JSMP monitoriza : 3*

Tipu desizaun	Númeru
Suspensaun ba prizaun nia ezekusaun (Artigu 68 KP)	3
Totál	3

B. Deskripsaun sumáriu julgamentu ba desizaun kazu sira

1. Krime ofensa ba integridade fízika simples ho natureza violénsia doméstika

Nú. Prosesu : 0219/18.OESIC
Kompozisaun Tribunál : Singulár
Juis : Dr. Hugo da Cruz Pui

* Desizaun ba kazu tolu ne'e tribunál notifika deit ba parte sira tanba Estadu Emerjénsia relaciona ho Covid-19.

Prokuradór : Dr. Matias Soares
Defeza : Dr. Calisto Tout
Desizaun : Pena prizaun fulan 6 suspende ba tinan 1

Iha 01 Abril 2020, Tribunál Distritál Oekusi notifika desizaun ba parte sira relaciona ho krime ofensa ba integridade fízika simples ho natureza violénsia doméstika ne'ebé envolve arguidu CT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 24 Dezembru 2018, maizumenus iha oras tuku 20:30 kalan, arguidu uza hudi kain ida no baku dala rua iha lezada nia liman-kabun parte karuk no basa dala rua iha lezada nia kanuruk. Antes ne'e, arguidu ho lezada diskute malu kona-ba arguidu fila husi partisipa serimonia kulturál ho kondisaun lanu. Kazu ne'e aneksa mós ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ona ninia hahalok. Arguidu mós deklarata katak nia hatene kuandu baku ema ne'e sei kauza moras ka kanek mezmu nune'e depoisde akontesimentu ne'e sira di'ak malu kedas. Arguidu foin primeiravés halo krime no mai hatan iha tribunál, iha oan na'in haat, arguidu nu'udar to'os-na'in laiha rendimentu fixu kada fulan no promete sei la komete tan krime hasoru nia feen iha futuru.

Antes tama ba alegasaun finál, prokuradór husu ba tribunál atu presinde lezada nia deklarasaun ka la rona ona lezada nia deklarasaun ona tanba arguidu konfesa faktu sira hotu iha akuzasaun. Defeza mós konkorda ho pedidu ne'e.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian. Prokuradór hatutan mós katak krime violénsia doméstika barak liu akontese iha Regiaun Oekusi kompara ho munisípiu sira seluk. Tanba ne'e atu halo prevensaun jerál, husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza husu ba tribunál atu kondena arguidu ho pena ne'ebé adekuadu tanba arguidu konfesa integralmente ba faktu sira, arrepende ona ninia hahalok no kolabora di'ak ho tribunál. Aleinde ne'e, arguidu mós di'ak malu ona ho lezada, fo'in primeiravés halo krime no mai hatan iha tribunál, arguidu iha oan na'in haat no arguidu mak responsável ba lezada ho nia oan sira nia nessesidade moris lor-loron nian.

Desizaun

Depoisde avalia faktu hotu ne'ebé prodús durante julgamentu, tribunál prova katak arguidu uza hudi kain ida no baku dala rua iha lezada nia liman-kabun parte karuk no basa dala rua iha lezada nia kanuruk. Bazeia ba faktu provadu sira ne'e no tetu mós sirkunstánsia sira hotu, tribunál konklui prosesu ne'e no kondena arguidu ho pena prizaun fulan neen maibé suspende nia ezekusaun ba tinan ida.

2. Krime ofensa ba integridade fízika simples ho natureza violénsia doméstika

Nú. Prosesu : 0200/18.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Matias Soares
Defeza : Dr. Calisto Tout
Desizaun : Pena prizaun fulan 5 suspende ba tinan 1

Iha 02 Abril 2020, Tribunál Distritál Oekusi notifika desizaun ba parte sira relaciona ho krime ofensa ba integridade fízika simples ho natureza violénsia doméstika ne'ebé envolve arguidu AAS hasoru nia feen. Iha Distritu Oekusi.

Akuzasaun Prokuradór

Prokuradór akuza katak iha 11 Novembru 2018, maizumenus iha tuku 12:00 meiodia, arguidu tuku dala dala ida iha lezada nia kotuk laran no dulas lezada nia ulun dala ida. Aktu sira ne'e rezulta lezada sofre bubu, mean no moras iha lezada nia kotuk laran no iha kakorok. Nune'e lezada ba hela tiha iha nia inan-aman sira. Antes agresaun ne'e, arguidu ho lezada diskute malu kona-ba lezada husu arguidu atu lori manu ida ba lezada nia inan-aman atu sunu lilin, maibé arguidu lakohi. Kazu ne'e aneksa mós ho relatóriu médiku husi PRADET no fotografia husi Polísia-VPU.

Tuir mai, iha 15 Novembru 2018, maizumenus iha tuku 20:00 kalan, arguidu ba iha lezada nia inan-aman nia uma no dada lezada nia liman no haruka lezada ho nia oan na'in tolu atu fila ba sira nia uma, maibé lezada lakohi tanba sei ta'uk no trauma ho arguidu ninia hahalok.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu sira iha akuzasaun katak arguidu la tuku maibé basa dala rua iha lezada nia kotuk laran no buti dala ida iha lezada nia kakorok. Entretantu iha 15 Novembru ne'e, arguidu deklara katak nia la dada lezada nia liman, maibé kaer deit lezada nia liman. Mezmu nune'e, arguidu deklara arrepende ninia hahalok, foin primeiravés

mai hatan iha tribunál, di'ak malu ona ho lezada, iha oan na'in tolu, serbisu hanesan seguransa sivil ho rendimentu US\$205.00 kada fulan.

Nune'e mós lezada konfirma ho arguidu nia deklarasaun katak arguidu la tuku lezada maibé basa dala rua iha kotuk laran no buti kakorok. Lezada haktuir tan katak arguidu la dada lezada nia liman maibé kaer de'it atu sira fila uma. Lezada hatutan katak sira di'ak malu ona to'o agora.

Testemuña LP nu'udar lezada nia aman depoimenta katak iha akontesimentu primeiru testemuña la iha fatin akontesimentu. Nune'e mós akontesimentu segundu, testemuña la haree ho matan maibé testemuña rona arguidu dehan ba lezada atu sira fila ona ba sira nia uma.

Alegasaun final

Prokuradór konsidera arguidu provadu komete krime hasoru lezada tuir faktu sira iha akuzasaun nune'e arguidu ninia hahalok sira ne'e prenze duni elementu sira hosi krime ofensa ba integridade fizika simples. Tanba ne'e, husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza husu ba tribunál atu fó pena ne'ebé adekuaudu ba arguidu ho konsiderasaun sira katak arguidu kolabora di'ak ho tribunál, arrepende ona ninia hahalok no di'ak malu ona ho lezada. Aleinde ne'e, arguidu foin mai hatan iha tribunál, iha oan na'in tolu, arguidu serbisu hanesan seguransa sivil ho rendimentu US\$205.00 kada fulan no arguidu mak responsável ba nesesidade família nian.

Desizaun

Depoizde avalia faktu hotu ne'ebé prodús durante julgamentu, tribunál prova katak arguidu basa dala rua iha lezada nia kotuk laran, buti dala ida iha lezada nia kakorok . Bazeia ba faktu provadu hirak ne'e no tetu mós sirkunstánsia sira hotu, tribunál konklui prosesu ne'e no kondena arguidu ho pena prizaun fulan lima maibé suspende nia ezekusaun ba período tinan ida.

3. Krime ofensa ba integridade fizika simples ho natureza violénsia doméstika

Nú. Prosesu	: 0162/18.OESIC
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Mateus Nesi
Defeza	: Dr. Calisto Tout
Desizaun	: Pena prizaun fulan 6 suspende ba tinan 1 fulan 6

Iha 02 Abril 2020, Tribunál Distritál Oekusi notifika desizaun ba parte sira relaciona ho krime ofensa ba integridade fizika simples ho natureza violénsia doméstika ne'ebé envolve arguidu AE hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 16 Setembru 2018, maizumenus iha tuku 06:00 dadeer, arguidu tuku dala ida iha lezada nia tilun-hun parte loos, tebe dala ida iha lezada nia kotuk laran no tuku dala ida iha lezada nia reen-toos. Arguidu nia agresaun ne'e rezulta lezada sofre moras iha fatin sira ne'ebé hetan agresaun. Kazu ne'e aneksa ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós deklarata tan katak nia foin primeiravés mai hatan iha tribunál, di'ak malu ona ho lezada to'o agora, iha oan na'in hitu, serbisu hanesan to'os-na'in ka agrikultór.

Antes tama ba alegasaun finál, prokuradór husu ba tribunál atu presinde lezada nia deklarasaun ka la rona ona lezada nia deklarasaun tanba arguidu konfesa faktu sira hotu iha akuzasaun. Defeza mós konkorda ho pedidu ne'e.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian. Tanba ne'e atu prevene arguidu la repete tan ninia hahalok hanesan inklui halo prevensaun jerál tanba kada loron tribunál sempre julga kazu violénsia doméstika, husu ba tribunál atu kondena arguidu tuir pena ne'ebé hakerek ona iha akuzasaun.

Entretantu defeza husu ba tribunál atu aplika pena ne'ebé justu ba arguidu tanba arguidu konfesa faktu hotu, foin primeiravés mai hatan iha tribunál, di'ak malu ona ho lezada, to'o agora la baku ona lezada no arguidu mak responsável ba nesesidade família nian.

Desizaun

Depoizide avalia faktu hotu, tribunál prova katak arguidu tuku dala ida iha lezada nia tilun-hun parte loos, tebe dala ida iha lezada nia kotuk laran no tuku dala ida iha lezada nia reen-toos. Bazeia ba faktu provadu sira ne'e no tetu mós sirkunstánsia sira hotu, tribunál konklui prosesu ne'e no kondena arguidu ho pena prizaun fulan neen suspende ba tinan ida fulan neen.

Atu hetan informasaun kompletu, favór kontaktu:

Casimiro dos Santos

Diretór Interinu JSMP

Email: casimiro@jsmp.tl

Telefóne: 3323883 | 77257466

Website: <http://jsmp.tl>